

四庫全書

集部

欽定四庫全書

集部

甬上耆舊詩卷七

詳校官石中允臣薩敏

主事銜臣徐以坤覆勘

總校官麻吉士臣朱 鈔

校對官學正臣常 循

謄錄監生臣趙廷璋

欽定四庫全書

甬上耆舊詩卷七

參政張白齋先生琦

監察御史胡文學編

先生字君玉少負異才年十二即能賦詩常手古人詩一卷其父見之投諸雪淖中先生徐徐取出暴日下夜讀之家貧為諸生時出游吳楚間授經以所上東脩歸養親能備甘脆每讀書至夜分稍倦則與其

徒取水交啜面使神氣復立乃更讀其勵志若此年
及艾始中進士授南大理評事歷寺正副前後所治
獄凡二萬七千餘人論駁務得其平有三人以造偽
章論死無所置辨先生視其章乃以箴布四邊中畫
字遂判曰箴作與私鑄不同減死一等司獄官落職
負甚將鬻其女歸先生以月俸為治行得免在南都
九年吏部再薦為督學使不報出知福建興化府為
政尚簡易務正風俗與諸生說經喜以儒術飾治有

古良二千石風郡中林見素先生海內宿望日與先生以文義往來每共登臨輒題名山壁人稱為文章太守奏治行第一然先生性嗜林壑數乞骸骨歸老辭義確苦乃進本省左叅政致仕先生操行廉白家無遺財人號曰白齋先生里居十六年惟以撰述為事于詩律益工彌造高妙日怡神于林泉雲鳥間嘗自贊曰辭讓太早似乎失利木石無虞何謂不智末年遺教曰抱病懷殘喘寄身屬杪秋愛山一輿樂水

一舟未死微軀已卜荒丘永謝之日不煩飾脩生也
既順死復何求卒年八十有一子嘉慶亦奇士為詩
殊有父風

余常讀先生集其自述曰予生平好學詩志慕古人
然多從實地生變化不敢為望空語今所梓行僅十
之三四耳自顛髮黑且蒼且白四方知音相遭如皮
陸固不可得晚遇見素林先生相知為獨深嘗曰夢
魂相接多在雪蒼雨碧之下谷答風響相和應亦微

哉續慕出耄言覺尤有味未知獲入梓否文字亦有
可取回首顧之度不能舉矣人以為實錄又論詩曰
自高揚張徐諸人學唐儘有好者後李西涯謝方石
張亨父及沈石田律詩甚多生意循唐人繩墨自能
傑然今盛世必有妙手不能盡知行且求之先生官
南大理在弘正之間時北地信陽名已極盛先生仍
盛推西涯而置李何于不論之列且云必更求妙手
此其立意卓犖不回能自異于流俗隱然可見今所

傳白齋集即梓行之十三四者也竹里館集則其耄言也合一千餘首余為選三百二十八首序之

序曰余少從家乘讀諸先輩贈先棟塘先生詩惟喜張白齋先生琦一絕句復從戴氏書肆見白齋集四本詩極可喜時方習制舉業未即購以歸且意謂先輩詩文如此類必多異時當得讀之未幾余學為詩求向所見白齋集已絕不可得偶見王鳳洲詩評于張琦下曰如夜蛙鳴露不離泥中架上舊有李騰鵬

詩統所選白齋詩亦注曰王鳳洲云云並欲唾之及
讀諸先輩選里中詩俱甚推重先生其論良是然南
江所錄凡二十八首東沙所錄二十二首與余向所
喜頗不類後之論詩者有稱先生嘔心刻腎務
去陳言品目甚當而所錄又只二首使就諸家所選
即鳳洲所言尚非甚過意中不平久之至前歲始從
釋悟留所得所謂白齋集四本如身客萬里外遇故
鄉良友驚喜交集釋于石又示其竹里館詩二本贈

先人絕句亦在其中而後先生之詩盡出矣余適在
患氣中且喘且讀手錄三百餘首竊謂先生詩發源
忠孝俱本于性情之正無愧風雅至其為興為比吐
咀山川驅使雲鳥草木與一時詞人絕不同間嘗于
諸體盡相題目樂府最為高手惜不多作古詩歌行
別有蒼然之色可方山陰徐文長而徐稍不及若五
七言律詩則妙矣至于五七言絕句則神矣今先生
自編其詩先絕句次律詩次樂府古詩即一詮次間

甲乙已定此可謂寸心自知者且先生歷官大理時
北地信陽方樹赤幟一時靡然風偃而先生高唱單
行不阡不陌是誠不可無一者也余因念先生生平
為詩惟晚遇林見素先生一人耳身歿以後久應論
定然其不知我者既橫相訾詬其知我者亦使與衆
人為伍畧無高下其蔽反甚于毀之今先生二集遺
板俱壞徧詢里中所藏僅存三四冊事固有不可知
儻更數十年此三四冊亦復散去將使世間第一種

文字遂化為脈望蕩為飄風野火忽焉盡滅天下寧
有是理耶此後起者所以不得辭其責也余既錄成
日為里中諸君誦之必盡一卷方已適梨洲黃先生
過訪草堂急取共讀相與狂呼大叫聲聲相接余更
起浮白一斗謂黃先生曰請于數百年中取一詞家
足當我白齋者鄴嗣願盡此斗先生亦笑謂余言不
狂次日黃先生歸舟中語萬生允誠曰白齋詩誠不
易得但袁中郎以士大夫身負海內之望表章一山

陰布衣世始知有徐渭今臬堂乃以東海老布衣思
表章士大夫不益難耶余聞其語為悵然久之夫余
既杜門漸老不與海內詞人一通名紙况悠悠千載
亦誰為知我者乃獨此愛異賞奇若不容口遂頓忘
其身之老且廢也雖然余不足傳而倘以傳白齋之
詩遂得并傳是終以士大夫身後之力引一布衣也
余固藉白齋先生矣

東樓

山勢彰坤厚天光薄太清臣家書萬卷換得此樓成

包氏東園

理蔓牽新綠疏泉放落紅敲門春午寂有客夏黃公

東山

飛鳥遺好音千峰不知處日出扶桑枝照見薔薇樹

杜甫遊春

萬里橋西路騎驢三十年較量春厚薄不及開元前

老子出關圖

道大無傳受騎牛西出關剛留五千字遺智滿人間

鵲鷄

朝飢下平田飽啄還飛去蒼鷹日附人肉食損高志

林下

窅谷千年樹深山五寸苔休官非絕響今見一人來

陶公小像

五馬俱何在孤雲得所哉山光悅人面豐勝未歸來

言志

得句霜鐘後怡神雪盡前
莫將容易看
比作藁心禪

竹雀

獨行入春竹路出鳥鳴澗
長風吹予懷仰見伯夷面

海居

水窮草木稀雲間但高岫
人家無寒暑海潮以為候

秋事

山邊實布地湖外石田莊
今年秋較熟大艦送官糧

省爨

省爨時推濟牽牛或助耕再須三五稔早晚義莊成

西軒

雷聽西江近簾觀太華低斜陽恰春意來照種花泥

溪船

家業計多少茶鐺及釣鉤橫行烟月裏誰敢犯虛舟

雨中

綠蘚寒逾碧山鷄濕不文江檣三十丈穿上屋頭雲

貧家吟

夕陽照泥垣鷄飛欲上屋爨下無束薪夜飯炊不熟

飲酒

戒飲長防病停杯愁不禁計量輕與重愁比病還深

久旱得雨偶題畫牛

已謂秋無望今成大有年山中三尺雨騎犢上平田

清橋夜月

月隱崆峒峰世人俱未看獨憐得句客照橋三四欄

見負薪者

舉世皆新事逢人非舊顏
析薪趨夜火隨鹿下秋山

柳塘風靜

迴合春塘水無風一鑑平
垂楊自天境多個是蟬聲

入村偶成

出郭動舟楫入村趨草樓
雨來江色闇呼子鳴白牛

藥壠

地仙不愛穀種藥方橋
右久雨不出門猪苓大如手

鷓鴣

不共山鷄啄雌雄自作陪寒山相對在春水幾時來

農耕

牛脊春陰惡溪風布褲單南人解占候還有種田寒

五日

蛙天五月五新水濫屋脚中有不眠人高燈聽蛙酌

題畫

雨片臨汀住斜陽赴暝收跳魚劃水面壞我一天秋

泛舟

人事山兼寂
江清酒亦清
晚來多少興
獨槩月中鳴

西樓

啼鴉作人語
孝子獨關心
仰見隴頭月
斜飛烏臼林

出城

東郊漸微綠
騎馬忻獨往
梅繁野渡晴
水落春山響

山水圖

山俗尚古野
五家同一村
何曾苦謝客
人自薄間門
雲裏秋風候
新蒸薯蕷香
我客期不至
潮水到寒塘

南山轉秋日歷歷窻戶裏留之不可得忽照前溪水
流水隨雲去宛然山共移乾坤安置好猶自作閒疑
閒道旌招至寒林亦或然虛聲原自起風葉走牀前

太白山

太白三千丈廬峰上與爭道人閒管事終日作山評

水邊叟

水居不業漁秋深賣柚橘睡美不知晚船頭海日出

醉俠

賒酒不論價強中奪馬騎千鐘酬死士五斗醉胡姬

橫石橋

地覺秋來瘦舟宜雨外晴野橋將浦樹扶得夕陽橫

偶書

翠管如吾影百年長繞身北隣纏十萬夜夜賽錢神

聽止窩

彙征生不競艮止夢尤安黃屋深天寵青雲儘蓋棺

偶題

藏弓安宿鳥移燭遠潛魚滿案閒居賦都無封禪書

旌陽山

晚翠橫過水晴雲倒落窻得渠明分野為我截秋江

曉起雨晴

涼風入庭樹曉日飛霜鳶墮髮如白雪強欲隨青烟

秋日雨中

貧舍珠如穀荒村雨似塵日來官府峭莫怪索租人

春早

牛膝寒嶽嶽野日收蠻霧鵠鳩溪南來催人脫布袴

畫景

一棹便為家清江又白沙魚筐寒不重大半是蘆花

雪屋書生圖

世上倚冰險山中讀雪安西風鑄剛骨更送一番寒

鷓擊鷺

不守螳蟬戒俄成議後灾魚蝦足新浦飢隼自天來

菊花

醉眠屋廬下開眼菊花黃多置三百篋與花收散香

風竹圖

寫竹如草書歷亂不成行只疑風霧裏爛醉過瀟湘

偶成

微月人生影輕風船弄波明朝還夜直涼愛北湖多

春懷

老夫饒白髮背立桃花樹寄書匡廬僧春山共來去

拾薪女

風葉狂飛面霜藤短刺衣勿傷楊柳眼留取望郎歸

畫景

斜日黃公壘清江翟子門東京塵有翼飛不到深村

西山

西山正可悅薄暮作鴉青吟苦人初瘦斜陽上竹屏

醉眠竹下作四虛吟

衣以藕絲作扇將鸞尾編酒應槽碧海人是簞青天

徐指揮畫梅

根是梁州鐵花如洛水神剛柔兩般性定我道中人
湖頭開欲過墻角一枝斜賴有長生筆為天留幾花

聞泉

心膽當年大龍門聽萬雷細泉今日志聲到竹間來

不寐

幽鼠響穿覆瓦白月寒帶初霜詩成枕上人瘦海入壺
中夜長

矮牆微照螢火玄狄入偷柿霜剗印去腰已久老懷挂

世空長

殘燭三更黑蕊白齋四壁玄霜口論庾廩虛實脚揣衿
裯短長

答俊上人惠竹

靈根過江三里淺碧遮山一重風靜幽藏孔翠雨來寒
豎羽僧鐘

四時雜咏

蝶入梨花無色鶯過青山較黃老眼不宜繁富新詩刪

去齊梁

林邊偶饑田父池上閒呼鶩雛十日閉門坐雨荷錢大
似盤盃

黃梁作飯秋熟綠橘搓香野歸對月穎頭神健下天鵲
頂毛稀

夢魂杜陵詩史歲月黃公酒壚舊歷纔看大雪高桃又
換新符

悅茶

齋汁雪中無此美
悅茶孤夢繞
鐺飛直尋陽羨山頭路
春月生時負擔歸

盛水採菱舟

閭闔門前水半城
采菱船去月如燈
禾飄黍爛無消息
明歲農夫學種菱

竹枝詞

桃花零落柳花飛
從此烏雲入鬢稀
舟楫無情天澹薄
載君東去未曾歸

朱端山水長圖有感

已把東山作急圖
水飛雲動與神俱
千峯萬壑啼黃鳥
待我歸來借一隅

題畫屏

人間舟楫銜艫畫
販魚鹽夜采珠
只有小家生意少
載船秋色過南湖

煎茄

絕無滋味假油煎
慚愧三公七筯邊
到得何曾無肉食

雨厨烟屋始論錢

四皓

風裏飛花未帖然
靜中棋子動機權
在山泉水青天色
流出人間不似前

書蘭亭記後

高竹深溪春事幽
文章千古說風流
我今猶恨當時筆
欠寫新亭一段愁

竹林圖

疏眉短髮開生面此是嵇公彼是劉竹外斜陽高幾許
讓他塞馬飲春流

壯遊

天涯雲月動飛旌劍逐龍駒出戶騰二十二條時務說
馬生何處拜昭陵

南寺游

手攀幽棧上青天惠遠前身定有緣斜日光中三丈石
大書太守寺游年

郡中休暇一探玄萬事關心未了然行上高臺試明目
吾民何處少炊烟

月峰山意何太古百柞千松挾雙廡歸時巷犬無警聲
長竹篝燈送明府

大雪

千峰雪片大如盂爛煮羊肪滿地鑪誰肯朱門開一板
野橋西望有僵夫

雪蕉

天寒白屋竈烟遲兒女燈前夜不嬉十日賣薪三日飯
雪中誰訴縣官知

過子陵祠

漁竿不重手難持來者何人往者誰獨有西山孤竹廟
與公前殿博毫釐

搥衣婦

冰霜入糲不柔勻萬杵邊頭聞不聞二十年來辛苦手
定無春筍得還君

贈李先生棟塘

棟塘仙凡在人間野氣春陰水一灣
小艇不量輕與重
晚來撐出載青山

秋景圖

雨洗青天風掃塵秋來山水澹于人
誰家鵝鶴鳴雙漿
直過江南採白蘋

過淮河

朔風鳴鼓下寒川西指淮流即是天
十萬人家楊柳樹

半開青眼望新年

直河

白草寒烟沒燒痕
鷓鴣飛處有柴門
直河莫道無關東
一曲河流抱幾村

梨園教曲畫

梨花千樹雨初收
大內春風不盡頭
新製樂章音調別
教他依舊唱伊州

晚次太湖口

落日扁舟似夢中
江南人在五湖東
靜聽沙客行相語
明日開帆有好風

竹鄉卷子

太行山高揚子深
一分平地直千金
便須種竹三百个
中起詩樓卧晚陰

琴士圖

風聲水聲十指閒
天地龜茲在此間
留我一條携鶴路
格開黃葉問青山

唐子畏山水圖

蠻天梅雨襍江潮
五月青林未可樵
泥白草深歸舊隱
一支山路入中條

小仙曉色圖

曉色初分畫者稀
吳生醉墨入元微
千村萬落月猶在
習習雙鳩出樹飛

墓樹

作花莫作墳前樹
三月清明便化泥
猶道春來愁尚淺

黃昏添上子規啼

題王從事南游卷

德公鄉里亦升堂
鼓篋雲山問道忙
浦雨梅風南國路
萬壺聲裏到襄陽

陳司徒與弟對牀圖

夜合燈花相映紅
尚書兄弟一尊同
雨風蘓髻渾相似
白者長公斑次公

偶成

半醒半醉倚繩牀
枕石江樓水氣涼
豆莢筋長瓜杵大
滿天秋興到南莊

山堂

馬前一鶴伴予還
萬卷圖經又未閒
獨喜年來堪自大
曲肱無禮對秋山

廳事後觀雨

胃強飡飲偶一盆
雨勢入屋不閉門
手肱曲闌眼力正
水面已沒芙蓉根

秋光

數行白鷺雪為衣
雲葉蘆花作陣飛
添個秋光迷物色
夕陽無處喚鷺歸

魏堂郵亭偶書

秋米累累斛十錢
醉顛飽腹似堯天
依山小戶無禾黍
春蔗成漿也有年

濠梁驛書事

雞鳴湖白此沙邊
斜日山光忽濫川
回坐壁間閒論量

半生長是逆風船

病起言志

草野歸心日夜謀
青鞵布襪上扁舟
蓼花東岸人西浦
相對芙蓉各點頭

閒居

不爭碁道懶彈琴
臨帖觀書偶用心
新水鷺黃三百個
門東流過是山陰

門前小雨罨輕埃
江上晴山帶薄雷
我鶴比凡高一格

茶烟生處却飛來

山乘木屐水乘船綠柳門前略似陶客亦可來無大嚼
黃雞秋壯一拳高

好酒三杯粥一盂數莖頭髮下千梳明燈矮屋松油氣
看到人間未見書

山客敲門不肯應青藤倚壁坐橫肱秋懷萬里誰知我
天目孤雲鴈宕僧

閒看舊史爭閒氣身約幽人負好期寂處有喧渾不覺

竹邊牛馬齧枯萁

一飲還堪盡一升酒邊萬事不相能
春來但覺詩神減
夜半烹雞祭少陵

草堂

寥落川流舊草堂開門正對杜陵莊
江村早晚無占候
只試風簾影短長

雪舟湖夜

簫管紅粧擁下船風流猶記十年前
老來骨硬無人愛

一翦孤篷看雪眠

秋成

五月今年不糶新土場秋穀大如塵夕陽待月藤蘿外
歸路村村有醉人

杏花巢鵲

三日營巢聚蒺藜烏鳶便欲奪高棲東風早晚來相管
吹上飛花補牖泥

扇景

勝事自知長獨往
白雲無意偶同遊
飛來花片尋常物
十里溪山拄杖頭

題畫有感

千秋觀下水入田
木落秋晴山近天
賀監宅前鷗鷺路
酒船歸去夕陽邊

有懷

南枝驚鵲北枝飛
碧海青天有夢歸
人在畫樓方獨坐
滿天明月白雲衣

夜夢會夏德樹同作

二月新林花滿枝
攀山蹋閣遠相隨
老來氣候尋常準
海上潮生正有詩

雲莊何君山水畫

門裏芙蓉浪裏沙
輞川風色似君家
只將畫筆當官府
閒納秋雲一百車

春日曲

高枕傷春睡未蘓
半醒殘夢繞南湖
鳥無聲處妨人見

花欲低時要我扶

曉起

獨立山前半是僧
數莖詩骨峭如冰
忽看乳燕初飛出
觸落薔薇露一升

春詞

酒堪剛制不禁詩
燕惑鶯狂未靜時
老筆年來愛壯整
茶蘼影裏畫烏絲

美目青江春出行
白雲承襪曉常生
閉門要學木居士

黃鳥相呼坐不成

愁結高城酒作兵相持三月未能平不如兩物都忘却
散漫春窻鳥一聲

獨語流鶯春樂章梨花葉底酒泔泔百年已割半生去
一歲無如二月長

乳鶯啼過柳枝低江雨晴來草葉齊九十日中無好醉
落花如夢到棠梨

得氣春蟲篆壁遊感時黃鳥說新愁我將定性書當枕

飛過楊花不下樓

石田畫幽人

無事山中倦眼摩起來
江上踏寒莎月從十五秋光滿
今夜梧桐影又多

舒嘯草堂

杜陵新樣草堂低
堂下江春碧蔣齊
歌嘯有懷誰我識
一鶯相對主人啼

江神

公塗海水一般情未可安然掉臂行十日江行無鴨蹇
惡風吹浪入山城

六月二十八日陸行至彭城病暑改從舟

妄以千金重此生出門無帶一身輕南風不動江流靜
綠樹扁舟煮藥行

一真

已隨挹朴子同歸漸覺雕龍世事非打坐溪邊照真影
年來啖菜也豐肥

合和驛南望彌望皆白土

當時戰血有餘腥
白土經年草不青
留得遺民幾家在
夕陽村裏掘蕪菁

題畫

絕巘猶堪安古寺
閒居定不著忙人
胡僧一隻西來脚
冢嶺山頭正出神

鈎勒竹

雖無大嚼飽公卿
終是西山餓骨清
昨日醉眠秋影下

小風吹得紫須橫

春野齋題郁君館

春風隨人出東城
貴客曳踵不肯行
有人短褐無羈管
脚踏飛花聽鳥聲

郡齋述懷

繁梅晴日畫屏前
薄餅新松錯進筵
糲飯龐公野人性
騎牛只記隴頭天

一松

不隨桃李墮蕪萊五百年長亦壯哉
聞道未央興土木
寒流石上有人來

魚畫

斷港楊花落作萍遊魚水面唼花行
新抽獨繭絲多少
將下吳門釣晚晴

欹枕面山小圖

樹卧溪流人偃石野亭涼雨入脾清
手橫一部南華子
山轉斜陽字字明

七峰圖

七峰尖峭似陳兵
江外諸山合與爭
天地年來愛藏用
淡雲微雨不分明

吳偉畫

秋水天長一色如
小仙分割借吾廬
斜陽紅葉間留坐
推過儒書讀道書

不寐

裏衲孤眠何處村
夜深吠犬若黃昏
吟懷欲出尋僧去

寒月斜光未過門

悼孫允廉

萬里蒼天尺五墳
天不收子地容君
西風數陣南飛鴈
似學文章寫碧雲

古亭

寒潮風退磯頭白
高樹紅欺葉上青
飄瓦敗簷秋影老
路人題作斷腸亭

雨中出郊

魚龍江上正飛騰
竹裏歸來笑不能
別有好緣生眼底
水明雲白一船僧

鶴山

鶴繞青山何潔白
青山近鶴轉分明
不知鶴外山多少
亂數芙蓉不記名

憶山

鶴沙舊路春江上
暮雨泥橋綠樹間
加我廿年間脚版
直須行遍水東山

松月圖

膝當木几耳當松夜色新生秋海東千古今宵有聲月
道人不坐寂寥中

感遇

青山花外旖旎日秋水橋邊寂歷僧眼勘百年天地裏
閒來此處幾人曾

溪家

紫絮茅花飛入門淺溪幽響出籬根當家老婦無他事

落日呼歸白鼻豚

飲舟中

虎丘山烟晚作紫
虎丘山花矯起舞
措笙落簫都不鳴
坐上微聞白雲語

過建灘

當年開設事難憑
水裏乾坤又一層
莫是女媧安不固
補天墜石亂稜稜

歸田雜興

子隨卽罷孫追翁高帽巡檐楊柳風門前泥深犢蹄白
船面日出魚尾紅

靜聽秋聲卷

秋聲先到翠山堂六尺孤幃未受涼我愛靜時天不靜
半天飄雨掠斜陽

文徵明山水畫

天外羣峰入紫青中間有路少人行江深草閣潮如客
早晚相過不世情

一默為林本聰

鷺啼座石燕牕東居士無言木石同最有吟詩禁不住
遠携聲響到山中

南莊偶成與嘉遇

夜探魚叢朝出耕耕漁兩事是平生阿翁樓上休呼醒
方與白雲眠有情

鄮州歌

山入關門海入州海中白蜃吐高樓公家政簡民安作

細雨斜陽歸飯牛

扁舟白髮芰荷香
共指前頭賀監鄉
西去洞天還有路
人家兩岼種昌陽

斤鹵青陽滄海濱
扶桑隔水是文身
江城新市無風雪
畫鼓朱旂迓早春

瓜鼠

食瓜食實勿傷根
生意微微復爾存
一鼠作灾猶小耗
人間草竊正紛紛

送嚴惟中

當日高吟白鴈天
寒流萬里雨燈船
別來楊柳青今幾
相對鍾山說往年

二月二日

江上輕雲覆戶低
杏花開好未黏泥
伯勞猶更嫌春淺
背坐東風不肯啼

贈康鵬

何戡一別動經年
不在梨園在賈船
今夜曲中無越調

江南人怕鷓鴣天

送許習之

黃山閣外竹雞啼
舴艋風前白浪齊
今夜勸君多酌酒
陽關只在燭光西

雪夜齋居聞朝用吟詩西舍

寒宵有警風敲戶
凍鼓無聲雪滿堂
便欲乘舟下溪去
詩家只在竹西房

靜齋

此中動靜互為根
四壁虛齋萬象存
茶竈不烟春火伏
鳥鳴竹響正開門

枕上作

山中飽飯廢三餘
老眼無光懶讀書
夜半不眠非有約
滿天風雨響梭櫚

楊光祿致仕歸鄉

平生付公論履道有神明
世感朝雲滅心歸春草生
走沙迎故吏啼樹候殘鶯
試問餘年事湖山無盡情

贈杭東鄉

白璧名方重黃金用未舒欲將南去舸收載北游書碧
草莎雞候青山荳莢初家僮得來信長簪帚烟墟

京師送沈署丞還宜興

別酒不成酣停杯放劇談雖依星斗近終念水雲堪野
漲通朝扈春山結早蠶故鄉無限興非是戀江南

有感題雲山圖

謾說歸來好遽然一繫匏我離天漸遠秋與寺爭高澗

底雲長懶人間夢亦勞
畫圖飛不入舖餽近蟻嘈

出門

何處問西東乾坤亦醉中
浦雲晴帶濕秋樹暖生蟲
案上行飢鼠牆頭飲絳虹
期不出口斗酒對隣翁

自述

歲月有今數乾坤多此身
惡懷時避客夢語夜驚人
淺道難還古陳粳不繼新
誰憐伏莽下白首病詞臣

許君春山圖卷子

山客春長醉日高呼乃醒
抱沙溪鳥白飼葉野蠶青
小雨癡晴石間雲幕晝
亭黜聰今久矣誰且詰忘形

寄徐東隱

我性耽迂僻公今亦憚煩
地偏如隔壤溪曲愈深村
桑扈春前枕蜩螂雨後門
更求人境外山水謝公墩

雪隱題顧郎中卷子

芒屨去無痕何人割曉昏
只疑吾夢寐別在一乾坤
五石深缸酒千峰獨板門
退藏猶未密花發暗香村

送王朝器致仕還閩

劉向今身老疏公志未迂甲科三戍後勞伐兩朝餘海
物懷鮮錯川流送小車對門彭澤宰高興近何如

輓葉司訓父

人世去千載泉臺歸幾重青山埋病骨落月夢衰容屋
老來新燕田蕪剩晚菘誰將寄涕泪風雨水西鐘

飲陳氏竹林刻詩竹上

竹瘦立詩骨苔圓獻酒錢水光搖地上天影到書前老

景無千歲殘題又十年稚兒如解意伴我筍根眠

寄李誠之

淮南君尚卧吾亦到江東細札間中寫新詩別後工晚
懷江竹雨秋髮渚蓮風莫負黃雞月山牀一醉同

水崖

對面高崖立盤迴石幾層近天多得雪帶雨或成水夜
皎疑游鹿溪明雜亂藤時將山脚水漸米飯隣僧

山居即事

高齋獨眠起雲午坐來虛林近憎啼鳥溪清見伏魚果
登留客喜箕踞揖人疎多少耽山癖年來覺漸除

石亭

我愛崆峒下幽亭傍石宜畫檐溪影動秋榻蘚花移聽
竹留僧久看山得句遲悄然天境裏未有世人知

石峰

莫道愛廉隅天然骨立殊不雲秋共老得月夜非孤此
脚曾登不當頭頗碍無百年吾隱几為汝有詩逋

為余君題保竹卷

豈不護枝葉深培在此根
皇天應有意人竹兩多孫
饒腹空千畝清陰蓋一門
興來不暇問脚眼到君園

黃翁壽日

竹祖垂垂老而翁或共庚
夜書燈下眼春杖陌頭聲
綺里初歸漢龐公未入城
孺田三百斛為酒樂長生

自述

脚少扶持力東山未及登
野眠孤似鶩衰鬢短于僧
盞

盡愁空室星闌算故朋日抄書百紙眠眼不宜燈

西山游

廬嶽有良期登臨老恨遲索竒尋漢雋行李帶唐詩淺
澗雲流雪深山鼠學麋不須問仙訣小隱是吾師

希齋晚逸

納納上羲皇原非學楚狂甕雞天易老海鳥日高翔笈
席秋光濕瓜田雨氣涼微吟伴閒步好景在斜陽

納履何所往青天不問程割雞留客雨賣藥出門晴彭

澤偶同飯長沮非獨耕鶯花久無夢只怪近春城

送陳君還蒲陽

南閩鄒魯俗曾未薄江東覽勝橫秋鶴歸程入暮鴻綠
蒲新歲事老守舊山公問信憑君寄揮毫似夢中

間新鶯

樓角一聲知風邪雨爛時爾來長有信我老本無期越
藻青相待吳糧白恐飢南人習仁善繒弋上蛛絲

朱仲德金陵別意卷子

新安佳孫子長揖陌塵中書記春江濶詩聯上客同馬
鳴雙樹綠花蒂幾州紅離思何曾惡青山行未窮

陳復新輓詩

湖海間高譽風神若見之化從觀物後清似在山時曉
鼓沈河樹秋塵生研池淒涼携鹿路來者復為誰

輓徐心齋

江水夢來急飛花不返魂醉鄉王績酒飯顛杜陵村格
筆橫詞苑飄衣到里門故人多少泪雲月寄黄昏

送駱經暮

離思隨春色人行花亦紅
帝廷趨斗北鄉里過山東
天道崇居抑雲司論有功
鳥鳴杯酒裏萬里鴈毛風

菜蟲圖

閒門通翠圃野意頗芳菲
土菜何青白春蟲亦走飛
誰家桃李盛此地綺羅稀
合會東園老茹芝言是非

夢遊雪竇寺

木杪上丹梯何人手共携
綠江飛白鶴陰洞出晴霓
落

葉隨僧散浮雲入院棲疑應夢中事聽到午鐘迷

感事二首

古昔聖賢國今為鬼魅場事權投寂寞父子見淒涼地
出廉泉細天流濁渭長誰收首陽骨雪白照斜陽
感事秋雲變憂時夜雨闌到門交富客稅畝及王官屋
破雞聲晚江虛柳影寒遙間太平信起舞夜漫漫

贈鄭崇善定海

千年真長令忠孝倚平生穀熟塗歌起官清縣鼓明禮

堤防海浪天監矚山城暫借鳴琴隙飛杯送我行

寄余潤之

直以遭時拙而深筆研功思君秋海白坐我夜樓紅暗
葉堦前走清砧夢處通壯游心未已龍劍得其雄

邢子用山居之作

青嶂挿天隅堂幽美事俱谷聲隨屨近山腹繞門紆草
發春先驗溪奔意不趨大觀齊物我不是學楊朱

秋日飲佛國寺用夏德樹韻

碧殿紺園西微風吹蒺藜安禪閉深戶驚鶻墮危棲雲
為青山在蟲過白露啼重游有無得十指豈能齊

送茹貢士還京

北土來應遠南州語未便鄉心搖絳蠟別思拂朱絃海
色孤舟路春聲百鳥天還期燕市酒同醉鳳城邊

月亭

明月生東海亭開興較長樹虛通夜色雲薄漏秋光野
博聞人語山書見字行所嫌猿與鶴啼白半堦霜

自貞卷子

貞節自家事茲言是確論未亾扶弱息終老樹衰門豈
為芳名激焉知薄俗敦南溪有剛石抱柱土床根

送薛世成之官湘潭

薊北三行酒湖南萬里官平分天上月獨照馬前寒野
水搖宮柳遺民說畹蘭楚鄉今大熟禾黍及征鞍

山居圖

水墨幅員裏真成前後村溪流卑似抑雲勢猛思吞突

濕烟催飯衣陳日送暄朝當迓新客春到翟公門

採芝

採芝綠林下草木映山衣獨觸輕烟去羣隨蒼鹿歸鶴
膏參夜煮茗掌共朝晞歲覺身能舉行將歷翠微

寄吳中知者

有吳季子去無蹤海上高流此再逢黑虎陳前曾族頡
白雲鄉裏懶騎龍五湖劈橘臨秋水獨寺尋花趁暝鐘
我亦乘桴來候子綠蘋深處採芙蓉

賦老

柘老桑稀繭未成，懶蠶無力罷經營。
惡懷每向笙歌起，好句偏從牖廁生。
改燧鑽榆新歲事，巡猫食鼠晚年情。
藜藜縣鼓寒無準，夜半東方不肯明。

齋居書懷與吳進士時在大理寺

寒肩峭壁聳孤高，此日齋宮戒頗牢。
白土軟塵藏綠草，春空晴日見秋毫。
薄官未負三年學，新歲剛抄一部陶。
記入寺門幾元夕，七番燈火照青袍。

暮春偶成

飴筆揮毫不了緣
放翁心事日茫然
千村土犬月照雨
半夜江魚潮入田
睡鶴小堂依病竹
挂猿深樹繫空船
有情天地方相得
未是匆匆話別年

弔岳武穆王墓

侵疆幾復捲鯨鯢
一檜橫遮帝眼迷
直北山河忘故土
江南烏鵲作安栖
皇天此日真難問
長劍何人得再提
寂寞墓前青血在
一杯還覆趙家泥

恒思遊天童未及夢或到之

聞說名山近上台每憑孤夢繞崔嵬雲從貝葉文邊過
人入蓮花漏裏來大士作齋吹宿火伏龍潛水抱輕雷
一場殘寢隨鐘覺日出東方事又催

輓戴思直先生

莫將夷跣費閒評詹尹從來卜未明生有文章留檢底
死無甌石累身名乾坤自好鳥三月風雨不晨雞數聲
急水飛花鄉里淚返魂何處乞更生

讀于肅愍公傳二首

昔聞長老談公事今日分明得傳看
手把一麾扶九廟口持孤論奪千官
北門鎖鑰非輕付中國鶯花不改觀
功在乾坤身殞草風吹碧血夜漫漫

尚書非樂踐危機社稷擔當合付誰
終古天心初莫定千年國是久方知
汾陽舊食生前報肅愍初刊歿後碑
碧瓦廟簷春有力古松挺鐵兩三枝

越州懷古

句踐雄圖得計來，苧蘿山外起高臺。
浮雲故堞終無盡，去國扁舟遂不回。
郭索上田秋水暗，鷓鴣拂樹野亭開。
傷心更有雲門寺，頭白山僧掃劫灰。

望夫石

一別夫君幾暮朝，山花墮髻不粧翹。
眼隨斜日應難落，骨立荒江未肯銷。
夢裏天雞霜渺渺，耳邊山鬼雨瀟瀟。
業身定是靈妃化，越水湘烟對寂寥。

三節

練麻績雨共黃昏促膝寒燈亦自溫一代蘋蘩吾與汝
百年門戶廢而存分明冰雪傳心事指點栝捲付子孫
草野寧無良史筆掇書遺事古今論

都氏節義堂

二字雙懸節義名人間此處指都卿鴛鴦早別鏡中影
母子相依兵後情令女肺肝今尚爾公孫氣骨久如生
年年一點天心在風雨堦前開決明

金陵送徐少叅之任浙中

叅藩重寄老成優已有先聲下百州天上星辰離舊次
夢中山水作真遊江流淨練縈華髮船起清歌答素秋
南國樓臺多少事還公紙筆記先憂

送徐揮使把總南日水寨

郡樓移席更江亭南日遙看海樹青虎尾捲旗雲滿座
馬頭試矢雪隨翎酒酣不住山猿舞軍令先教水怪聽
莫把一隅當小事彈丸萬里繫朝廷

竹輿過曹娥沙書事

孝女江邊老又行
菖蒲風外苧袍輕
潮如愛客隨人遠
雲不過峰與樹平
魚入浦船商欲動
粽香田屋雨初晴
黃鸝知我歸來路
先去東山報一聲

桐廬道中

諸山夾水一千重
七月扁舟汗雨濃
櫛葉全青秋隱浦
桐江半黯月當峯
淺流見石高于象
旱氣橫天白似龍
來濯清風子陵廟
豆無丹荔薦芙蓉

遊孤山拜和靖先生祠

先生刺住在孤峯隔世相尋尚可從青草去分春水路
畫船來貯夕陽鐘百年老子心相似一豆新魚味不重
我有白鷗公有鶴雪晴雲散共開籠

秋晚登君山

十年兩醉君山酒山下民風似昔年青帕茜裙耰麥女
銀鱸紫鱗入村船霜焦葉破猶藏寺江浦沙高未作田
病骨登臨尚強健風吹孤嗽落秋烟

遊靈谷寺宗長官留別因飲于此

出城望谷十五里吹帽東風一面當春柳變禽驚首夏
午林騎馬忽斜陽逢僧方外衣冠薄食笋山中七箸香
記取宗公今日別千峰鐘磬晚蒼蒼

遊雪竇寺

春寺蒼茫春鳥鳴竹輿嫋嫋上天行路藏幽竇千年雪
雲借深山半日晴乍入鼓鐘真夢寐相看麋鹿是平生
茶鐺詩卷隨身轉未信招提宿未成

南岡為朱克諧僉憲

不數前朝五柳莊物情風思在南岡乳鶯啼過紅梨熟
雄雉肥時碧筍長雙漿渡江分野色兩峯當戶轉晴光
蒼生望眼今何似未許東山不下堂

徐隱君宜晚卷

郊酒纔醒酉酒濃出門小雨洗秋容未收殘果紅棲葉
欲落斜陽紫滿峰行客有家投遠聚歸禽無序逐昏鐘
人情景物都宜晚坐把長竿拂卧龍

送劉子吉

相逢一度面猶生，忽漫詩篇寫送行。
立馬江山正繚繞，入雲鴻鴈不分明。
沙城近到鄉音習，布襪輕來海氣晴。
人道君身是神物，他時風雨看崢嶸。

次韻朝用公署漫興

泠泠孤磬出烟微，半面西風淡落暉。
人逐樹長成偶影，鳥隨雲去作高飛。
流年宦學徵詩稿，滋味山耕憶布衣。
世事巫咸何必問，吾年今已過知非。

五斗功名亦不微，好懷長自綽陽暉。
酒觥老去纔知滿。

筆勢春來只欲飛夕潦未乾還及履陰苔不掃或成衣
偶然詩景居然就始信西崑鑿者非

尋常莫覺此生微花外雲光柳外暉世事十年班馬逐
好懷一片白鷗飛酒當醉處呼山茗涼未生時結草衣
氣味從來有相似詩窮不信孟郊非

忽覺潮聲到枕微誰家泝泝打晴暉空雷不雨龍淵伏
乍暑新蟲蝠暝飛詩句健時心仗手遊期遠處杖牽衣
與君唱答何當了猶起更端問是非

不入城

不入城而又入城半生心跡未分明乍逢麋鹿相招去
今覺山林有路行越絕漫須悲往事吳歌且自學新聲
雪蕉霜柳垂垂在寒對衰翁亦有情

西湖遊題母侍御卷

畫船雙槳古今同湖曲垂楊半渚宮烟逐帝魂流水上
鳥依僧夢白雲中山花欲接遊人語溪獠新歌太守功
忽漫風光容易失不勝春望小樓紅

送何舉子汝和還江西

一迴相見一迴好高論崢嶸不倦聽曉惜流光臨寶鏡
夜攤文字對華星靡蕪野送王孫綠鳧鳴秋排河漢青
我老城居間隱几待君春信耳驚霆

新霽和周仲鳴韻

馬踏江光動淼微雨收江上未深蹄人知舊路山藏郭
鳥悅新晴樹滿溪漁浦細帆橫翠葦野氓高壁圻青泥
謝家句法驚神鬼老我相逢下首低

趨杭夜泊湖口

詩骨崢嶸肯獨眠，不禁湖雨亂喧船。
山低水影疑無地，海遠鷄聲若在天。
殘夜斷雲迎缺月，昔年荒徑入新烟。
探囊手測金深淺，不穀揚州買鶴錢。

東歸會稽道中

稽山東出烏門斜，春晚烟晴感物華。
十里長亭栖短樹，滿天晴日落黃沙。
蠶生野屋鳴桑葉，水送漁舟入麥花。
引手來朝指歸路，小江高柳是吾家。

遊天界寺次韻馮子際王叙之

焚香交襟澗花馨
世界天開一戶庭
客欲入山消息大
鶴間墮石夢魂驚
溪流曾點僧頭白
山影橫侵佛面青
風日來朝晴更好
雨中先見兩三星

閒居言志

老著芒屨猶健行
閒從物外起經營
土喧蚓唱連三月
春睡鷄啼過五更
迤日捲簾收宿霧
趁雷尋笋掘山坑
昨非今是心方定
也學龐公不入城

冬夜書左氏壁

兒孫長大眼中來，歲晏天深覓數杯。
半夜寒溫灰裏火，百年灾異雪中雷。
事如有種生難了，錢已無神去不回。
相見官梅顏亦厚，東風又作一番開。

新正漫興

滿壁晨光不可眠，地爐新燎栢枝烟。
案頭新紙更陳檢，門外寒江是舊年。
止酒有詩還自解，送窮無鬼只虛傳。
襟期安得二三子，擬約齊山泛酒船。

錢塘雨夕

歲寒風郭鬢華新暝結虛檐客舍貧千里有家難入眼
百年惟影不離身爐藏宿火吹猶活雨閣遙鐘聽未真
越鳥莫啼泥滑滑來朝江上有歸人

石假山漫興

瓦雀檐頭啁哳鳴小山幽意靜邊生風泉閣激無全暑
雲日相欺得半晴石學枯禪叅壁坐螳緣新蔓過溪行
百年蹤跡收來此猶恐人間有浪名

初著三峰便古蒼曲欄四面白霞光蓬萊裂地分迂叟
天姥飛雲入短牆朝士絕書金屋遠隣僧敲夢竹門涼
碧阿安個方池子小作江湖釣夕陽

石色山光照晚年城隅少地有餘天放船人誤桃花裏
乞食僧叅栢子前幽侶可容浮海筏清時不用鑄山錢
傳經心事知何似七尺藤牀對掩眠

將之鄒溪過東錢湖作

眼光久誤是非機今日湖頭試道衣狎浪鳧雛依母出

衝人雉羽挾雌飛晚晴沙客歸村小春病山僧下山嶺稀
不負風光答佳句前身誰是謝元暉

義興沈時明天趣卷

心想閒來清似水乾坤納納赴幽期數花溪上坐終日
逢客林中留幾時海燕未回雲占壘山童忽報雨臨池
來朝尚有天隨子相約春江下釣絲

送陸子淵還上海

白石孤城雨點斑送君恰似送春還蠶天好繭晴初結

水殿眠龍晝不關中散風流傳海上建安詞賦落人間
別愁定託江門月直映淞南第九山

書趙芝巖輓詩卷

玉立長身如見之紫芝巖下好光輝十年一別剛迴首
老淚深情又濕衣春草地紅生躑躅曉山燈暗落薔薇
故城耆舊今多少轉覺年來眼裏稀

齋居值雪感事

蒼茫何處測天倪三日清齋慮未齊雪逐春來猶是瑞

詩隨景造不安題新年樂國千家酒瘦馬行人萬里泥
閒事關心續燭坐隔湖聽到丑時雞

送朝用僉憲山西

十年大道感親聞雞寫忘形日與羣春逐鶯花杯裏散
江流天地眼中分客懷戀土看吳月馬意先人入晉雲
經略肯分閒筆研豈無長賦弔河汾

送儲侍郎

名世文章受竊教日光家至得新鈔應期翥鳳真千仞

利見龍飛正五爻
堠吏出迎穿浦樹
羣公追祖進山肴
過門淮海遑將否
回首春城定倚橈

新正與朝用唱答用其韻

海霞照屋曉光高
春事關心睡不牢
人到百年一過客
吾當十日九揮毫
時名滿地忘消息
諧謔隨宜散鬱陶
料理東風今有準
轉頭吹到使君袍

秋雲

乾坤何物寄高情
檢點秋雲一片輕
偶向定僧叅野座

金匱石室
卷七
或隨飛鶴趁溪晴
吳峯雨薄垂高影
楚竹天深礙去程
莫道無心任飄忽
年年釣石與漁爭

送董啟之侍御

長揖人間鷺鷥姿
大篇時復畏雄詞
十年萍逸真無繫
六月瓜成似有期
東國舊廬龍懶卧
上都新事鵲先知
天應直候清平起
五兩南風迅迅吹

送李司空

年來歸興百川東
太極峇堯有疏通
栗里舊風高靖節

龍門新社得司空茗斝酒盞醒還醉雲錦風髯白又紅
蹤跡飄然肯回首弋人何處篡冥鴻

陶君柳莊詩卷

柳市南頭丈五塵却于深處得清真隔江燕影常來晚
當戶鶯啼直過春暮雨突衝無獵騎社天沈醉有歸人
遠尋二十年餘計割取東牆作我隣

寄計惟中

流澌荏苒逐行舟先後從君出帝州龍虎一時皆散地

江湖滿眼忽深秋，崢嶸舊論春風座。
汗漫殘書夜雨樓，何日山城秋酒綠。
百杯飛送說離愁。

送葉司訓

公事閒來恰送君，萬山烟樹倚斜曛。
離歌對酒無三疊，殘暑先秋退一分。
人向別時方是客，江于南去半無雲。
隨君夢落西齋小，坐裏春風長燕芹。

落花詩次沈石田先生韻

幽歡失賞恨方新，酒盞寒生饌味陳。
犬吠月娛江上影。

馬隨風辦陌頭人更三已遂成殘夢身百應難贖再春
庭北風光差可咏獨憐君側有人嗔

風向東來花向西風花天氣意如迷人憐娥媚何曾掃
鳥到淒涼不肯啼響屨廊前悲越女踏歌江上舞巴嫫
餘芳未了東城興春瘦誰仍手共攜

游佛國寺次王侍御韻

山行雙耳足鶯啼春潦霑裳手自提古刹今僧相見少
新篁舊竹長來齊茗甕取水妨龍毒革履穿花得麝臍

侍御頗知吾碧眼
昨來長紙送新題

泊淮陽驛訪李郡判成之不遇

依微帆影歛江干
粉堞青城岼嶂看
山向北來多古色
路從西去有春寒
陳茅野屋相連破
高柳風鴉不自安
今夜使君何處在
鹽城遙憶去漫漫

與孫允防司訓別久操舟夜過飲中作

枯潮不到古城邊
努力篙師夜進船
白髮青衫見君處
風簾細燭醉人天
麒麟官舍增三子
蚪蚪殘經又十年

正好相逢不相別數聲昏鼓送寒川

寄杭東卿秋官

眉采清風定如舊思君不見夕流深燕駒北赴當年市
越鳥南飛何處林客夢夜寒常懶作詩家春老亦高吟
芭蕉葉短青還在細寫悠悠別後心

寄孫吏部同年

馬前同看陌塵紅一十年來似夢中鳴鶴天聲揚日下
小桃風瓣落江東詞鈍讓鬼殊難送詩癖為城未易攻

欽定四庫全書

甬上耆舊詩
卷七

五

欲問佳期天近否絳河終夜挂梧桐

送愚隱劉先生還廬陵

留都下馬能幾日纔入秋風歸思濃老去心情傍鳧鶩
晚來詩句上芙蓉盛時雲日開文繡何處烟洲信短蓬
乍別仙郎定惆悵不勝江月坐初鐘

越中盛水感事

短髮扁舟越水濱斜風亂雨夢中身四更水白先疑曉
二月山寒未受春新燕舊巢來有所孤村獨樹住無隣

城隅零落殘僧影猶似吳兵過後人

竹屋

甘棠館下地如今方廣優涵竹屋深千畝笑人耽逐逐
百年著我寄陰陰溪流響至通幽籟風拂枝開見遠岑
安得與公分榻坐夕陽聯句答春禽

出郭

一部新詩一部蛙夕陽出郭路幽斜水邊地冷苔生髮
山外民貧竹有花厖犬上墻嗔過客牛羊下坂逐歸鴉

欽定四庫全書

甬上耆舊詩
卷七

五

誰歌白石南山岸不是陶家是甯家

宏路驛早發

赤瓦黃茅數百間居民多事早開關濕螢焰竹火依火
疲馬出郊山復山照路野花應自笑上天雲鳥幾時還
手中秋扇難遮得梧葉風前客鬢斑

質菴為黃用芳賦

犧尊不飾似迂愚人到真純事始無酒醪隣翁期盡飲
手摩孫子教相呼虛文上薄顛孫氏知己平交棘大夫

聞說東村耕事近，手拖方竹耳提壺。

送周茂中還鄉

寒氣江山濫不收，青螺蜩縮紫髯虬。
殘年滯雪傳新歲，五日敲冰過一州。
水底龍泉能照夜，雲中鵬翮要逢秋。
也知鄠杜天非遠，王掾年來尚黑頭。

送王侍御父歸烏程

一見先生一洒然，神儀如鶴在秋田。
袖中健筆風兼雨，身外芳尊日似年。
曲磴飛梯游了寺，紅菱白藕夢歸天。

茗東漁伴尋常有第幾灣頭洗釣船

之平海

青天欲盡海雲東遙見孤城浩蕩中
紗帽白浮行地土布輿青捲下沙風
漳河盜滅憂仍在越國秋深信未通
薦黍莫愁常作客水邊來去有漁篷

天雨雪七十日偶晴得塋先妻

雨雪雲頭散積陰微晴如下塋棺
金垂楊終古今朝始芳草平田此路深
老去枯骸難獨立春來寒夢日相尋

剪茅欲結思亭子與雉同飛不出林

自遣

門堂塵土不秋毫五尺新苔喜自勞
綠野日中僧笠小青天雲靜鴿鈴高
偶成佳句狂幾杜自漉新醪略似陶
舉土作山纔一丈對風仄枕聽松濤

將西遊訪舊感懷

扁舟昨夜雨如塵今日微晴上綠蘋
路入林低潮裏樹山行月黑虎窺人
道逢知者詩增價身到衰年酒是親

震澤白雲無恙否相思千里一勞神

古意

井中有水通天河井性何曾通浪波不知誰作轆轤綆
亂我心緒當奈何井底泉義士志昨夜東風怒捲地井
上太行吹不去

誤馬曲

郎騎白馬若練帶青絨作韉玉為轡別時馬前細屬目
郎心或改馬色在太行山頭烟霧深馬色亦似遊人心

終日出門望白馬浮雲細草何陰陰占雞卜響皆不定
鬼神那識楊花性思君白髮千丈生蘭花無香藕花病
人生不如燕子飛朝銜青蟲傍壘歸儂家花落葉滿樹
郎騎白馬西家去

吳娃曲

鴛鴦始雛羽未黃吳娃十四依母傍畫眉令作新月格
著粉教學荷花妝娃年雖少能自惜母言似良意甚慝
俟妾十五身漸長賣妾奉侍青樓客東家阿母盜無米

幼女牕前相笑喜，養鳩嫁鳩禮所宜。
零落甘隨草木死，黃金雖多何足誇。
妾眎黃金如土沙，寧令五十無夫家。

短歌行

有翁野望泪滿眼，掇衣涉水水過腕。
時飢野雀鳴喧啾，隨翁入屋如有求。
物性無過得一粟，翁雖三餐百憂足。
東隣鳧鳧割生鵝，亭賓樂客酒滂沱。
鳥性只求無網羅，朱門雖高不相過。

寄楊名父先生

偶出國南門秋風動吳沼佳人隔扶桑日出方杲杲照
見玉雪膚德音日三澡飄飄白霞裾覆以青桂葆南北
不可忘星辰隔昏曉彼媼不自陋鉛華以為巧豈不傷
遲暮那復事妍好夜理機上絲千端縈積抱達旦始成
章一寄萬里道

奉答德樹

童子來雪中遺我高士牘悠悠牘中語新菹咀寒綠令
人發浩興臨流取桃竹削竹勿傷手尋君曲江曲

喜雨後篇

壬申祈得豐續熟望癸酉以為官府職漸舉百廢後去
冬孟仲月遠入是歲首百日不一霖天漢淨如帚民曰
吾小人立計春最厚牀頭種子白撤土日已久滋潤不
相濟田容白割割予乃召民言罪在予德醜我民不吾
釋如續挾之肘吾亦矜吾民如身卧在疾南衢畚草壤
北巷辟雞狗入山顙龍湫拜道塵楊柳林公
謂見素真宰
心恭敬尤不苟湯餅慰飢渴士吏遍入口卑龍入霄庭

感應捷桴缶續日便得雨人稍事南畝察屬益精虔誓
公各勿負終然動帝衷霂霂喜大授河流無高平牛馬
失來走縹縹馳雲師曳曳鳴電母千村樂新作百農應
歌吼會當起倉積且毋辨笱斗隔雨聞農談疊疊及太
守我今老且慵于汝力何有

望雲思親卷子

浮雲興大陂悠揚忽斷續遊子感時序升高振芒屨親
舍隔秋海遠入千里目我願雲有神結為雙車輻朝發

暮及庭安事騎黃鵠

錢廷節母輓詩

君昔速觀化神依獨木主辛苦四紀餘死復與君伍手
持白玉璫納君懷袖畢璫有貞節文上不愧秋日秋日
復秋日射見江水深江寒蓮葉死生子多苦心

畫蘭為朝用賦

風絮何悠揚下襟塵土飛澤蘭無情思流水澹容輝此
草久不見重我長相思客有水墨枝為汝傳芳蕤一本

數百葉中花藏幽竒置君隔疏綺相對無一詞但知守
貞性焉能明素懷畫蘭不畫意蘭花不如草至今蘭與
草無人辨惡好

傷親詩

涼風起中堂蹶我骨肉親蛛絲度空幕月光照流塵雞
亦不肯鳴天亦不肯晨悠悠漆園夢千載螻蛄春安得
東牕日重照白頭人

慈烏失其母嗷嗷無好音落日雪片急低飛下丘岑隨

身幸有影與雪兩沈沈天無十日雪鳥懷百年心來朝
雪自晞鳥啼只荒林

金風既戒秋城空月出早砧杵西江鳴寒聲發孤小賤
子不願聽誰肯為輟搗萬戶一片月何以分惡好仰盼
石楠樹中夜落飛鳥

哲人日已遠誰謂天有德隴樹日已長誰謂春無力春
能發樹枝樹無怨春色暖風不作花零雨下清滴啾啾
樹間鳥喚我拜寒食

由也昔未貴日負五升米為親煮饘粥親悅由起舞親
死南遊荆廩粟多如土開襟視肩痠皮色潤如乳更使
米上肩日光向西吐

糗糧纔餬口云胡道三牲五日不一肉鶩釜無腥烹所
期在末晚親豈解長生親死兒有肉啜囁如鼯鼯孝哉
顏大夫猶泣生前羹

晨雞號如故夜燈豈無光天地一昏曉悲歡異人腸往
時雞與燈聞見在高堂今日雞與燈颯如丘壠旁俯仰

百年內誰能無感傷

蕙帳吹晚風
慈幃死秋竹
猿鶴如有懷
噉噉鳴山曲
我聞猿鶴啼
猿鶴應我哭
風起月色暗
江流影如墨
虛堂誰與言
中夜起燒燭

遊長山

偶偕羣從遊
騎馬秋山冷
笑語應谷聲
揚鞭亂江影
入山尚未深
而有山栖境
紅子落長藤
蒼苔覆笱井
短棘刺我衣
朔風吹我頷
飢腹覓蕨根
健步出松頂
樵人四

五家炊烟忽生暝問樵何處山云是丹霞嶺黽勉越崇
岡豁然見高景飛鳥盪胸至浮雲暗生脛遙瞻泰華蓮
俯睇彌明鼎萬象紛來犇一一授公等陟高原自平可
以發深省

海漁

何物此老人殺竹南山青維以雙繭絲赤脚踏滄溟滄溟
有龜魚尾甲搖烟星長竿不易觸經年失飪烹吐吐世
間人潢汙事鱠鯖朝取或盈車暮引足充羹室以驕婦

子堂上媚賓朋老人在海上豈無羨魚情重理珊瑚竿
黃金以為繩河伯恐戒嚴無使神龍驚吾今大下手鸞
刀伐鯢鯨

廣平太守蝗出境瑞蓮生卷子

諸侯為政無大難禦災致祥纔兩端廣平太守有神力
手迴化機如轉盤先是農夫遶田泣飛蝗下田無子粒
太守威德如馳霆一蟲不得留彊隰先是汙沼草無芽
沼中渴裂啼蝦蟆太守恩澤如雨至一蓮再出雙頭花

蝗飛出境民有飯瑞蓮花開水欲爛江北于今千百州
安得無蝗有蓮看

山人鼓琴圖歌

山中日月不論數野客何曾識去住君持琴來知為誰
我亦適然來此處一彈一奏巧相同君則為徵我為宮
風泉松葉發天聽十指不動智技空乃知萬事難自足
師襄成連俱漠漠回首溪堂夕靄高問童炊黍猶未熟

壽郭典簿父分題得魚山

欽定四庫全書

甬上耆舊詩
卷七

空室

魚山之色亦太古晝日晴天飛霧雨只疑方丈臨前楹
無乃終南屏深戶正月四日春一分魚山花開真為君
餘慶能無念若祖再拜東風酌白雲

送翁長官分韻得樹字

江寒鳧鴨方念羣江頭艇子不肯住衆客臨江動愁色
雲邊直指象州路願君為我立斯須高歌一曲白日暮
海邦居人曾未知東風已動枕椰樹

風雪圖歌

晚家西山傍老姥十月作雪天惡苦斗新剪茅成小屋
只開東牕關北戶樹梢撲地落凍螭啾啾瓦雀吟朝飢
禽蟲此時若不利山客高齋今獨宜五斗秫米作酒醞
阿嬾來言勿酤店鮮魚出冰黃玉光松火入突碧烟燄
我笑袁公誠老迂雪中僵卧如小夫復笑子猷好生事
夜半擊漿依風蒲不如坐對家人面酒酣高歌一曲還
敲壺

山中歌

欽定四庫全書

甬上耆舊詩
卷七

空室

深山古苔滿地碧淺山流泉走白石深山不接淺山雲
今人還尋古人迹漆園先生竹皮冠芙蓉衣薄秋風寒
秋風寒欲歸去昏鴉栖滿溪頭樹

郭節婦

古人見善必疾書常恐遺落無收拾况于守令司民風
重此一事更汲汲豐蔀幽茅有隱賢青天杲日何由及
且如林氏女郭家嬾天性堅貞世希有初笄入門方少
年桃葉桃花纔十九姮娥在天常獨居倏忽神明啟其

偶時猶女腹無遺娠如梅未實杏未仁一心凜寒百不
動形骸已作全亾人與姑依依日相慰無女無男從寡
身嫁時釵頭發玉采今日筍底栖浮塵荼苦薺甘不自
覺眎藥如飴亦可嚼行年三十六春秋更老百齡終嬾
郭天生直絕識得明夫家尊重父家輕寧父終歲不一
往往見伯叔心怦怦節婦無言非寡情井水何曾答風
聲叔氏當朝老中丞忠貞道氣九垓橫有姪女質酷相
能為女談事天為清賈充馮道日改面嗟爾男子之為

生

叔父謂
見素公

浴鳧軒為封君林太守

小江曲湖莊門幽白石磴藤來不休有鳧飄然倦雲遊
下與魚鼈爭春流先生野情適相求鳧亦不去同沈浮
汝羽青青吾白頭人間日月如馳騶萬錢為買木蘭舟
千丈深淵下直鉤海翁前生曾狎鷗與物並育吾誰仇
天隨鬪鴨尚機謀還讓先生居上游

環溪歌

環溪天開三萬春六丁鑿蜀不鑿閩不雪自白山藏怪
無雷作聲龍有神谿勢若往洊又復大環縣置天地腹
西堪策杖東種竹水無驚波地有穀太丘孫子溪上仙
昔與海翁爭釣船事權今日難輕謝猶寫溪山放目前

贈王廷直山水歌

我詩未工不如畫王君工畫過我詩幽谷水遠草木際
詩意未到畫盡之十年懷才近禁御天光映筆生神氣
五日一日得偃沐門中清客揮不去如我老迂無所長

愛君之畫不能寐，
眼中有我常十分。
為我用筆如用軍，
黑逼太陰晴作曛。
白橫草樹青聯雲，
尚恨窄幅如短帚。
未足展運游無垠，
昔時韓幹名善畫。
伯時老格真其亞，
當年交游寂有人。
少陵山谷相聲價，
千秋萬歲作者稀。
我詩頓覺無光輝，
何當生絹一片裏。
致我詩句登元微。

黃子和黃灣行樂圖

笠澤深赤壁壯遊人，
蘇公陸魯望兩生。
出處稍不同筆勢，
相持豈相讓。
黃子志騎黃鵠豪，
時為蘇放為陸誤。
落

塵網二十秋時時有夢飛黃木黃木灣扶胥口驅風行
船月載酒醉中被髮晞不乾脚踏秋江寒入肘有客東
來雙白襦身乘白雲掌有書為言太乙蓬萊住問子世
上今何如公卿紛紛多列土手執事權如執虎平生但
知虎養威為虎反噬今無數黃木灣中今可來百年灣
上無虎灾青蘭碧竹滿天地幽鳥輕雲日快哉夢中微
言猶在耳山川便覺生眼裏故鄉豈無賢者徒前輩還
招白沙子

喜雨第三篇

去年八月喜無雲我從北來憂頗殷時冬刈禾得半實
又有稗子插其真城中井泉到底竭百家出汲江之濱
我志去官箭在彀如笋謝籜未離身喜置百責無一可
倚毘一老有餘親十月寒風吹捲地魚龍結蟄無經濟
千山明峭多霽色四澤空縣斷陰氣以首觸石求石知
大冬禱雨無乃似豈期誠信無陰陽舉手加額雨驟至
海郊礫砢十丈強壺山東南土愈剛麥子下地一旬發

野人期作三月糧造化膏澤重傷患樽櫛未肯來泱泱
春晴又復成亢烈癸酉之憂未能忘郡前父老滿道白
謂今礮穀錢兩百黃睛富民有紅腐翕縮不糶窺我逼
眼前飢瘡聊自捫後若更飢易子食天聽為聞作雲霧
變黷如商雨分數終見雷霆擊東海雨點驟白無行路
野婦赤脚走遠塍歸牛翹鼻浮荒渡舍南舍北飛屬玉
禾如青油潑農目今年賈楚定不施秋米上倉敢虧斛

淮關行

北門淮關多雨霧濁流廣墊不可住風鑽破板索舟瑕
烏啄枯蘆窺水蛙雲沙茫茫日易暮絳蠟華燈在何處
黃昏溫被雨暫止半夜再作喧兩耳巴蜀漏天置我床
杜陵破屋無過此舵工疾起少良算久晴無備只長嘆
兩番織葦麤掩濕五鼓譙樓寒達旦雨細作雪如吹塵
對面相語不見人十錢一束換青薪市酒亦覺生精神
陰晴變化不可必人生遭遇理亦一事當風雨且努力
豈得前途無白日

海鷹歌

海風西來天作蒼胡鷹爪吻如劍鉞長飛萬里不見雪
回依草木觀四方妖狐黠兔頗無數或時人立直當路
鷹也側目若有思世人那得知其故鷹乎鷹乎飢乃爾
水衡珍禽飽欲死衛公使寫寫不行方信鷹揚當上卿

林良戲墨圖

林君寫意不寫形筆鋒賦物真天成水墨一斗沛生氣
乾坤萬類皆含情水則有聲石有影百禽爭鳴日不靜

短脰長吭辨族殊高飛下逐雌雄並水無射弓山無梟
弱能自立強不驕爾我相忘齒角利觸之不怒皆囂囂
我願區中開廣域晝行夜宿無戕毒千門萬戶置此幅

風木慈烏圖

昔年堂前樹好時清陰為蓋臨軒池深根不撼地維定
夜夜慈烏來哺兒颶風一夕捲土至吹得堂前樹憔悴
樹葉落地烏以飛烏雛啞啞啼不去雛欲為烏報含食
長天茫茫海雲黑安得扶桑千丈枝風吹不動烏寧翼


黃昏步溪上見烟月可愛

明月在天烟在溪烟中看月無光輝沙禽熟眠潮未響
野火歷亂船初歸天邊楊柳誰家樹烟月相含不知數
此時幽景寄不真莫是江南夢歸路

次夜又步溪上

月夜不減昨夜好秋霽家家夜飯早蔓青芋子白酒香
土門竹舍黃花老農談悠悠靜可聽皆說官家今太平
斗斛上倉不過概差船點馬無兼丁翁哺弱孫婦抱子

依依相對桑麻裏我願明月長此光不照離愁照歡喜



甬上耆舊詩卷七